

Amalie raam die Scheier aus

Amalie, raam die Scheier aus,
's-kimmt Musik unn Kunscht eninn,
die Fans, die kumm'n aus Meenz eraus ...
... Kultur uffem Land iss in ...

Amalie, raam die Scheier aus,
Amalie nemm die Schipp,
Kultur kimmt jetzt in unser Haus,
mer sinn jetzt uff em Trip ...!

**Ref.:... de Billy gei't die Quetschkommod' unn de Gallé klampft uns aaner,
en Blues iwwer unsern guure deire abgefüllte Rivaner ...
... unn Nachts do simmer dann staawisch vun die Stiwvel bis ins Genick
unn abgefüllt wie unsern deire Dornfelder-barique !**

Uunn unser deier Nochberschaft, die kriet es Maul net zu,
wann die vum Hütz die Bilder sieh'n ... statt ner Oorewäller Kuh ...
... dann steht de Schnawwel - des iss wohr - vun uns'rer Nochbersfraa
uff wie unser Scheier-Dor ... unn sie kann nix mee saaa ...

Amalie, raam die Scheier aus,
die Sach' die hot ern Reiz ...
... Dei Freundin hilft der gern debei ...
... i c h hunns jo s o im Kreiz ...!

**Ref.: ... de Billy gei't die Quetschkommod' unn de Gallé klampft uns aaner
en Blues iwwer unsern guure deire abgefüllte Rivaner ...
der – kühl serviert unn kühl getrunk' – erfreut des Städters Schnut ...
... wobei es fer uns Baure aach en Müller-Thurgau dud ...
... unn Nachts do simmer dann staawisch vun die Stiwvel bis ins Genick
unn abgefüllt wie unsern deire Dornfelder-barique ...**

Amalie, raam die Scheier aus,
s-kimmt Musik unn Kunscht eninn,
die Fans, die kumm'n aus Meenz eraus ...
... Kultur uffem Land iss in ...